

խորանին Հայոց, Հայք տարածեցին դափուոցն մինչեւ չորիցս անգամ, և նոքա բարձին. ասպա ժողովեալ այլազգի Շէյխք տեղւոյն կամեցան խաղաղացուցանել զնոսա, այլ նոքա ոչ առին յանձն, մինչեւ այլազգեաց ձեռօք իւրեանց բանալ զճանապարհն ըստ կամաց նոցին. Հայք դարձան յերուսաղէմ և պատմեցին Դատաւորին զեղեալսն, և նորա կոչեալ զթարգմանն Լատինաց՝ կշտամբեալ յանդիմանէ զնա վասն դրան և ճանապարհին. և թէ Հայք և Յոյնք բաժանորդ եղեն անդ հրամանաւ Արքայի, և զձեզ ոչ ոք գիտէ ունել տեղի անդանօր և դուռն ձեր նորատաճման է, եւ ոչ յատուկ մուրհակաւ, և զիմօղ համարձակիք զեկեղեցին Հայոց առնել ձեզ ճանապարհ, օգնութեամբ արիւնարբու Ֆէլլահաց, դուք ասէք թէ Փոխանորդն ձեր չէ աստ, և ոչ տայք տուրս Տէրութեան, ասպա զի՞նչ են արարք ձեր. այսուհետեւ չունիք հրաման կազել ընդ Հայս վասն հիւսիսային դրան և եկեղեցւոյ, մինչեւ ունիցիք վաւերազիրս այլովքն հանդերձ:

Եւ յերեկոյին յայնմիկ եկն Լատին վարդապետ մի թարգմանաւ 'ի վանա Հայոց, և իբր չքմեղս լեալ ասէր թէ՝ Տեսուչն և Ծերակոյտն չունին հաճութիւն ընդ այն, և թէ՝ Փոխանորդ տեղւոյն եւ այլք ինքնազուլս արարեալ են զայն, և ասպա աղաչէր հանդարտիլ 'ի բարկութենէ և տնոխակալ լինիլ. զի Փոխանորդն մեծ չէր անդ, և միաբանք Բեթղէհէմի ստահակք եւ անհնազանդ մեզ, իցէ թէ 'ի դրդմանէ Յունաց է այն. սակայն ճանապարհաւ իւրք հանդարտեմք զնոսա: Հայք ընկալան զբանս նորա, և խօսեցան հաշտութիւն, և թէ՝ չյարուցանել միւսանգամ վէճըս վասն դրան Այրին եւ ճանապարհին, աղաչէր զնոսա վարդապետն գնալ 'ի Բեթղէհէմ, տեսանել զտեղին եւ բառնալ զխռովութիւնն, թէպէտ Հայք յառաջագոյն հրաւիրեցին զնոսա գնալ անդ՝ բայց նոքա ոչ կամեցան, եւ մեկնեցաւ վարդապետն սիրով երթալ պատմել իւրոցն: Իսկ Հայք առին գիր 'ի Դատաւորէն և 'ի Քաղաքապետէն առ գիւղացի Ֆէլլահս, զի մի ոք իշխեսցէ բառնալ ըզտիրոցս Հայոց յեկեղեցւոյ անդ (յՅ Փետրվարի): Տեսուչն Հայոց ետ ընթեռնուլ զգիրս 'ի լուր ամենեցուն, և նոցա ամբաստանեալ զմիմեանս քակտեցան 'ի միաբանութենէ: